

## **41. fundur Breiðafjarðarnefndar, haldinn 19. júlí 2003, kl. 18:10 til 19:20 á heimili Jóhannesar Gíslasonar í Skáleyjum.**

**Mættir:** Friðjón Þórðarson formaður, Guðríður Þorvarðardóttir varaformaður, Ásgeir Gunnar Jónsson, Þórólfur Halldórsson, Magnús A. Sigurðsson, Sigurður Þórólfsson, Jóhannes Gíslason og Ævar Petersen.

*Fundarritari:* Sigríður E Elisdóttir.

Farið var í vettvangsferð um eyjar á Breiðafirði og voru Bjarneyjar fyrst heimsóttar. Þaðan var ferðinni heitið í Rauðseyjar og í Sviðnur. Að lokum var haldið í Skáleyjar þar sem ferðafólk fékk kvöldverð að hætti eyjamanna og nefndarmenn funduðu.

Friðjón þakkaði Jóhannesi fyrir skipulagningu ferðarinnar, leiðsögn og góðar móttökur.

Hann setti fundinn kl. 18:10.

### **DAGSKRÁ FUNDARINS**

#### **Fundargerð 40. fundar og bókanir í fundargerðir**

Formaður las upp fundargerð 40. fundar. Fundargerðin var samþykkt með smávægilegum lagfæringum. Umræða átti sér stað um bókanir einstakra nefndarmanna í fundargerðir.

Ævar benti á að skýr skil verða að vera á milli þess sem einstakir nefndarmenn láta bóka eftir sér í fundargerðir og mála sem eru afgreidd og samþykkt af nefndinni í heild.

**Afgreiðsla:** Ákveðið var að þegar bókanir eru gerðar eftir einstaka nefndarmönnum sé þess getið sérstaklega og að þær séu orðrétt ritaðar í fundargerðir innan gæsalappa.

Aðrar bókanir teljast samþykktar af nefndinni allri.

#### **Kræklingarækt við Purkey**

Tekið var fyrir erindi Heilbrigðiseftirlits Vesturlands, dags. 20. júní 2003, þar sem óskað er eftir umsögn Breiðafjarðarnefndar um drög að starfsleyfi fyrir kræklingarækt Breiðar ehf. við Purkey, Dalasýslu.

**Afgreiðsla:** Breiðafjarðarnefnd getur fyrir sitt leyti fallist á leyfisveitinguna, en óskar hins vegar eftir að fá upplýsingar um þann varnarbúnað sem fyrirhugað er að setja upp til að hindra ágang fugls í kræklinginn og áskilur sér rétt til að gera athugasemdir við hann áður en honum verður komið fyrir.

Breiðafjarðarnefnd telur jafnframt að á gildistíma starfsleyfisins verði leyfishafa gert skylt að skrá ágang fugla í kræklinginn, s. s. tegundir og fjölda, og hvernig fugli reiðir af við varnarbúnaðinn, s.s. hvort hann snúi frá eða ánetjist og drukkni.

#### **Byggingaframkvæmdir í Flatey og Hrapsey**

Tekið var fyrir erindi sem frestað var á síðasta fundi frá Umhverfisstofnun, dags. 5. júní 2003, þar sem óskað er eftir að Breiðafjarðarnefnd fjalli um hugmyndir Þorsteins Jónssonar og Tor Ödegaard fyrir hönd norsk-íslensks fyrirtækis sem ætlar sér að byggja upp menningartengda ferðaþjónustu á nokkrum stöðum á landinu. Þeir óska eftir að heimiluð verði nýting eigna í Flatey og Hrapsey.

**Afgreiðsla:** Hvað hugmyndir um framkvæmdir í Hrapsey varðar telur Breiðafjarðarnefnd þær það viðamiklar að gera þurfi deiliskipulag fyrir eyjuna. Við gerð þess skipulags gerir Breiðafjarðarnefnd kröfu um að tekið verði tillit til verndaráætlunar Breiðafjarðar.

Breiðafjarðarnefnd óskar eftir að fá tillögu að deiliskipulaginu senda til umsagnar.

Breiðafjarðarnefnd er almennt þeirrar skoðunar að koma þurfi á heildarskipulagi yfir ferðaþjónustuna á Breiðafirði sem allra fyrst.

Í ljósi afgreiðslu þessara mála óskaði ÆP eftir umræðu um hvað fælist í því “að taka beri tillit til verndaráætlunar Breiðafjarðar”. Nefndarmönnum þótti ástæða til að skilgreina það nánar en umræðunni var slegið á frest til næsta fundar.

### **Stöðuskýrsla um stöðu og umfang skráninga á menningarminjum og örnefnum**

Magnús sagði frá því að hann hafi rætt við framkvæmdastjóra Fornleifaverndar ríkisins um þá hugmynd að gerður verði þjónustusamningur milli Breiðafjarðarnefndar og Fornleifaverndarinnar um gerð skýrslunnar. Magnús mun leggja fram drög að þeim samningi á næsta fundi.

**Fundi slitið kl. 19:20.**

**Næsti fundur ákveðinn síðar.**